

樂

全

集

一七

卷一

金

車

七

總校官中書臣朱 鈐

校對官中書臣吳 俊

謄錄監生臣楊兆豐

欽定四庫全書

樂全集卷三十六

宋 張方平 撰

神道碑

故推誠保德宣忠亮節崇仁協恭守正翊戴功

臣開府儀同三司守太尉致仕上柱國許國

公食邑一萬八千四百戶食實封七千六百戶

贈太師中書令謚文靖呂公神道碑銘并序

皇宋受命光宅天下唯上帝顧保世賚良弼在太宗朝

有若呂文穆公蒙正率循大卞人寧王家克左右亂四方以底綏大業聖上纘服有若元宰太尉許公寅亮一德謨明修輔答揚祖宗之猷訓以緝熙於光明此所以持盈保成重雍累洽隆無疆之基者也公諱夷簡字坦夫文穆公之從子太嶽之後流光源深大王父夢奇唐兵部侍郎北京副留守以文穆貴追贈太師王父龜祥以殿省丞守壽春有善政沒因家焉考蒙亨嘗舉進士禮部奏名處高等方從兄執政嫌不就廷試後選集吏

部銓得引對太皇顧判銓王旦曰某佳士奈何以蒙正
故抑之旦曰此其文學政事有過人者即授光祿寺丞
改丞大理無祿早世公登台司追錫命三代並至開府
儀同三司中書令兼尚書令封齊祁魏三國咸平三年
章聖始御便座閱郡國貢士公以進士擢第解褐絳州
推官再調鹽城監判官將漕以幹局聞就遷大理丞權
定鹽筴度署西溪大儲放利會詔舉六科以才識兼茂
試政事堂屬將封泰山或言非訪闕政時因例報罷出

倖通濠材譽曰洽章聖識其名濱城並河水羨溢為害
寇萊公鎮魏請擇守於朝上諭宰司而以公行到郡循
隄防究民利病平繇省賦拯諸墊昏暇日閱征簿見田
罇之筭曰先儒有言王道本於農此何名哉表請除之
朝廷推其法天下自是農器無征太尉王文正當國深
器重公時王沂公曾在西掖文正嘗從容問沂公頗知
呂濱州乎曰聞名舊矣太尉曰他日成天下之務者斯
人也君善交之後公竟與沂公同當鈞軸徙兩浙提點

刑獄時緣瑞符繕靈宮上所嚴嚮貴權督作外希風旨
趨副期會役徒斬材或殞林壑吏輒以亡命聞而囚其
孥公具條白採伐為緩械木浮河調夫挽送方冬水涸
暴宿河埭公請一切散遣須春流番兵更還陞覲面承
慰獎擢刑部員外郎知御史臺雜事賜五品服數治詔
獄聽訟事閱實明辯當比平恕天禧旱蝗祆民驚譁屢
奏謹言指陳變咎公之論事婉而正辯而裁通而易從
不崇空語以干浮譽故人主樂於聽受嘗臨諭曰卿言

朕自主勉毋悼害復因占對稱旨特寵金艾近姻除中丞換起居舍人領通進銀臺封駁從官小會必蒙特召後亦不得以為例也每上前目送注意殊渥內史缺丞相進名而不及公帝曰呂某固宜此選公適持金絮使臨湟命虛負以待復節除兵部員外郎知制誥俄授刑部郎中龍圖閣直學士知開封府都邑務劇尹正才難擊斷者雜中善良循恕者并容姦蠹公之為理雅得其術威而不猛寬而無犯機芒不施區橐自破治政清淨

府庭肅然逮今言尹京之政公為吏師今上莅阼優除
右諫議大夫永定甫竊內璫徙筮山辭連冢司詔公馳
驛覆視初陵既復同軌如期朝廷曰能遂以給事中參
知政事自章聖愆豫希見大臣翼室宅宗房闔助治二
府機政稍復壅閼公時判禮儀事請親戶牖之聽以分
帷帟之重杞絕矯漏用周幾微綴衣移御即請罷天書
儀衛納靈文方中閣然日章其慮遠矣祐主登祔章獻
慕往本室器服欲如事生公執禮文竟循舊典東朝叅

決抗尊當宇裁蒞儀物無溢等數事規諸萌務全王體
進貳六職歷小宗伯小司徒毗贊七年遂正宰席領景
靈宮使集賢殿大學士一心百慮知無不為推選名儒
增設講員敷經上前導以典學每奏事之間輒引經史
稱古昔以諭哲惠日新發於啟迪玉清災議止繕營因
表謝宮使加吏部侍郎昭文館大學士監修國史登冠
三階公自叅貳兼掌國策合三朝之載以緒成大典至
是史成凡預筆削率被遷賞公前事確讓特蒙褒許久

之拜中書侍郎兼兵部尚書復辭都兵章懿之即遠也
獻后俾為菽塗且毋變朝夕公請褻事如禮司天探旨
撓以拘忌獻后遣謁者挾日官使公裁公執大義不可
奪卒制服發哭考古日備宮仗葬近原以究恤典禁籞
春宴獻后命無廢會公固啓而罷輦幄顙威龍德務晦
懿不待養弗言而毀得伸情禮繫公將順且念輔臨之
久而虞倖密之間規中造膝事為之慎自此至尊舉
息皆章惠躬泣簡用剛銳任之言責協規交警俾懷后

心欽承二宮周旋十年內無隙言外無異慮孝慈篤至
固由上聖之姿佐佑彌縫抑自嘉猷之助天聖保定公
實勤止禁城火領使庀作落成進右僕射兼門下侍郎
時二駕復新宮肆大青恩覃內外特疇公勞而加異數
公請均同列懇讓不拜止以吏部尚書兼鸞臺獻后登
遐上念章惠擁翼之勤褒上崇名著之遺札公以漸不
可長亟白刊誥止奉保慶之冊以揭大明之照時王路
方正乾剛獨運攄發健粹始初清明公手疏七條以端

治本杜宣授止中書斷側門之貢絕刊章之弊天下聞
聽廓焉更新永底蒸民之生則惟我后之德袞司十稔
深懷抑畏頓首上前祈避重位制授武勝軍節度使同
中書門下平章事判陳州將行燕見願得上三年計帝
曰行矣半歲其還相余公之在朝也則聖人之心易然
而無天下之憂公之不在於朝也則聖人之心慊然若
無與屬其天下至於朝議塗說咸企公歸如期而召復
冠鈞衡修明治方綜覈名實自左右常任準人牧夫俊

又在官本於訓迪光天之下至於蠻貊之邦但見巍巍之尊如天之覆美利所及日用不知惟景祐之平康則變諧之績用若乃並脩三后著不祧之式以顯揚文武之烈崇建中壺尊順成之體以嚴對宗廟之重其糾睦公族也則官之環尹以別庶姓勗之講學以納軌善其章叙庶工也則陞之類舉以合公論集之朝郎以嚴班制伸理誣枉若寇忠愍之比悉及昭恤紹續功舊如潘武惠而下咸加甄叙此又贊襄餘論推廣德澤一二大

較也若其沃心話言極深研幾慎密不出莫悉聞已
景祐二年拜右僕射冬至上享帝於陽丘封申國公三
年表六上納政手札譬止次春復五上天子重違冲旨
命以鎮安軍節度使檢校太師同平章事判許州在許
二年而夏戎叛公聞之曰嘻鷄羽翼成是必颺去吾恐
謀國者慮害不深事失機先必致朝廷旰食已而如公
言卒至繹擾天下被其勞故徙公鎮魏固河朔心公比
當衡每籌邊奏揣敵動靜效如在目及此過覲手詔問

策公備陳西北守禦利害朝議賴以適從至魏浚城洩
除器備審佼壯籍蒐補其缺番休訓肄聲懾戎境大河
之北長城岌然康定元年五月復召輔政悉仍舊秩騎
寇犯塞赤囊日至公慮屯戍之久生佗盜心於是始議
營北都城鎮寧以謹北門之閉募民兵增州防以重庶
邦之守三邊守宰悉從擇遣俾綏凋敝諸府裨校間為
召見使知感歎夜思而得旦請而行已而北人來渝平
山東饑多盜備預有素恃而無虞冬郊改封許國公特